

黃梅縣志三十七

雜志

祥異

九疇洪範休咎有徵雨暘寒燠驗用攸憑後世文人浮夸沿襲神降石言河清鳳集梅之祥異紀歲豐稔每兆兵事天象驚心大亂既平經緯協序十雨五風宏開壽宇志祥異

唐

僖宗中和二年三月天鳴無雲而雨後有黃巢之難

宋

淳化元年六月掘口湖漲壞民田廬舍皆盡江水漲二丈八

黃梅縣志

卷三十七

祥異

一

尺通志

隆興元年秋螟蝗蔽野殺禾稼

醜熙七年大旱通志

嘉定七年正月燈夕黑雲暴作當面各不相見遊人踐踏死者無數

元

成宗二年癸丑自春至秋大旱隕霜雨沙

至順三年壬申四月地震越三日大雨雪雹壞民屋數百餘間暴風揚沙石東觀源湖之間有船自水中掀起半空墮落者



順帝二年丙子春地震山崩

明

洪武十年丁巳正月十八日夜雨黑水如墨汁五月大水

宣德元年大水

通志

宣德二年六月初二日隕霜殺禾

正統十一年大旱

通志

正統十三年大旱

通志

天順十五年九月地震

通志

天順無十五年誤載

嘉靖二十三年甲辰大旱自三月至七月不雨民間有經旬

難望九餐火斗米堪求八歲兒之謠

黃梅縣志

卷三七

祥異

二

嘉靖二十八年己酉七月有虎入市噬人官遣捕戶殺之

嘉靖二十九年春雨木冰結成幡幢之形黏人鬚鬢皆若老

翁

嘉靖三十一年五月初三縣境諸山遍起蛟龍大雨平地水

深踰丈縣署學基淹沒過半人畜死者數千

嘉靖四十五年冬凍雪三月裂足死者無數

隆慶二年正月夜雨黑水

隆慶六年二月雨雹天昏黑大者如升小者如鵝卵氣腥甚

邑西鄉壞民屋千餘間斃者無數禽獸池魚亦多死焉

萬曆十六年戊子大旱民攜老穉乞食於外道死者相枕藉

有盜劉少溪聚眾數千據宿松柴家山作亂蔓延梅境三年始剿滅之

萬曆三十六年戊申五月大雨四旬不息洪水汎濫長堤寸潰巨浸懷山穀價異貴人情洶洶

崇禎四年辛未地震二次

崇禎七年甲戌天雨黑子形如五穀

崇禎九年丙子六月下新鎮雨冰末

崇禎十四年辛巳邑大疫死亡過半貧者不能具棺葦蓆裹屍棄之中野

崇禎十五年壬午十一月孔壠鎮地藏菩薩眼中出淚一縷

黃梅縣志

卷三十七

祥異

三

循鼻而下拭之復出至十一月二十三日獻賊陷城焚戮極慘

國朝

順治二年乙酉四月地藏菩薩淚復出五月大兵追逐闖賊至此及左兵前後經過寸土蹂躪又值大水離散饑饉相仍蓋兩試兩驗云

順治九年壬辰歲大旱米價五錢一斗民多流亡

十年癸巳上沿港虎夜入居民譚氏宅噬殺一家老幼六口併豬牛牲畜天明虎未去鄉人截殺之古角鎮童家灣居民程充之家被虎夜入室殺男婦五口止存一幼男亦被

傷醫治得活當夜又傷穆家三人虎亦被殺

康熙二十四年大水 通志

雍正四年大水 通志

五年五月二十八日洪水汎漲下新鎮水際忽見一物腦如
獅睛如鬼口如牛耳脊紅浮沈水面自頸以下不可見
萬人集觀旁若無人至六月初一日乘風雷去

九年大有年 通志

乾隆元年大有年

四年七月七日西北鄉地震二次

八年正月苦雨米貴人多掘土而食 俗云觀音土

黃梅縣志 卷三七

祥異

四

十九年大有年

二十九年大水

三十一年大水

三十二年大雨隄潰

三十四年夏大水隄盡潰

三十六年秋冬大旱井多涸

四十八年秋大水隄盡潰

五十年夏大旱石米六千有奇人多流亡道確相望

五十三年秋大水隄盡潰積雨三閱月民房多倒塌

五十七年夏大水疫

嘉慶二年秋七月飛蝗入境

六年正月大雪平地深數尺秋有年

七年夏大旱百日不雨歲大歉石米五千有奇

十一年大有年

十二年大有年穀價賤石米不及千錢

十三年大水

十五年夏積雨彌月深山蛟起大雨如注平地水深數尺田廬沖塌無數平原有年

十六年有星孛紫微垣

十八年夏大水秋冬不雨有掘地丈餘不得泉汲水數里外

黃梅縣志

卷三七

祥異

五

者

十九年正月大冰凍樹木多折歲大歉石米四千有奇冬大雪湖冰膠舟人多餓斃

二十三年大水

二十五年大旱禾多稿

道光元年夏蝗生田鼠害稼

三年夏大水隄盡潰穀價騰貴災民聚城候賑棲息祠廟死者相枕藉

四年正月望大雨雹疾風迅雷木多拔夜大雪盈尺秋有年十月朔天雨豆麥穀米瓦灰色味苦澀

六年四月一日戌初白氣經天自西徂東約二三尺光如練
聲如裂帛數刻始散

九年平原野獸食人非豺非虎兇日貌貅田園守望者咸架
木棲止

十一年夏大水踰三年六尺隄盡潰米價騰貴民多流亡

十二年春夏大饑癘疫傳染道路枕藉苟延者食肉立起食
梨亦愈

十三年大水隄盡潰較十一年稍減

十五年大旱自五月初八至六月二十雨後踰閏六月至七
月中旬乃雨秋七月飛蝗蔽天所過竹木葉立盡

黃梅縣志

卷三七

祥異

六

十九年大水隄潰七月有星晝見

二十一年春積雨秋大水潰隄十一月朔大雪六晝夜平地
厚三四尺甚者五六尺屋多封戶或壓倒深山僻壤有缺
糧斷火而舉家凍餓自斃及行路自殞於冰雪中者

二十三年春二月日入時白氣如練斜亘西南踰月始散

二十五年秋雷震大南門

二十七年孔壠鎮地藏神像淚下拭之復出

二十八年春小雨月餘無麥夏大雨浹旬數口水陡長二丈
餘尺隄盡潰梅城東南三門由舟出入七月初四至初
十大風七晝夜田稻飄落如帚農家有絕穀種者

二十九年正月十八至三月初六小雨四十八日麥苗見日
盡萎四月十三至六月初九大雨五十五日水隰上年四
尺街市行舟月餘西南諸城門都被水封堦間可泊船垂
鈎爲數百年所未見春夏四山蛟起無數土多崩裂五月
十八獨山鎮山陀數十丈其山下田有推而外徙者
三十年麥大熟

咸豐元年四五祖山大樹哼

二年春碩鼠晝出百十成羣有重至三四斤者十月初八平
原火光夜見大如炬小如燈自後天陰屢見
三年邑多虎屢晝出

黃梅縣志

卷三十七

祥異

七

四年十一月五日未刻池塘水如沸上湧尺許踰時乃止
六年大旱自夏徂冬四閱月不雨斗米五百文
七年大有年

八年春蝗生四月初六白虹貫日八月初旬彗星見北斗之
南根如芒帚梢若散絲約長十餘丈直指太微十月初十
夜有火自北而南聲如裂帛赤光燭地

九年正月二十八夜天有赤氣見井分秋大水潰隄五月二
十九戌刻大星殞於星張之次分裂數塊其光如燈

十年豺噬幼孩無數三月十六天雨麻豆黍稷麥有盛以筐
者得三合許秋有年

十一年二月五日天雨米麥色黑搓之成灰四月既望長星見於北斗之南約長數十丈首如白練尾若疏網綿亘半天五月後漸小而散八月初一五星聯珠日月合璧冬野豬見於山中大者數百斤喙長尺許子母成羣荐食地產惟蘿蔔不食居民喊逐徹夜不休十二月大雪厚數尺行道有僵斃者湖凍舟膠山木枯如蟬蛻

同治三年麥穗兩歧

四年六月十三夜月暈如輪五色相間精華奪目七月十三八月十五夜亦然除夕有怪物見湖中

八年仲夏大水隄潰十月天見火塊自北而南聲光赫然

黃梅縣志

卷三十七

附異

八

十二年正月十五平旦天裂口於正北方精光閃灼聲如雷轟移時始寂

十三年二月蔡山下鎮雨雹大者如升小者如雞卵壞民房屋七月長星見於西北

光緒元年夏大雨月餘旋大旱兩月冬寒冰凍樹木多折

二年夏杪四山蛟起先亢旱祈雨漸變陰寒六月六日午未刻猶微晴忽晦暝雨傾盆注平地水深數尺歷申酉刻止古角壠坪小溪考田元角等鎮山裂同時起蛟淹斃人口以百計衝壓田畝以千計漂沒房屋器具牲畜以萬計考田尤甚十九日復大雨蛟起水更深為數十年未有之災

附伐蛟說

桂林陳文恭公宏謀撫江右時興國等處蛟水大發傷害人民田廬無算盡焉心傷思所以案驗而剪除之未得其要適書院主講梁先生出一編示公云蛟似蛇而四足細頸頸有白嬰本龍屬也其孕而成形率在陵谷間乃雉與蛇當春而交精淪於地聞雷聲則入地成卵漸次下達於泉積數十年氣候已足卵大如輪其地冬雪不存夏苗不長烏雀不集土色赤有氣朝黃而暮黑星夜視之黑氣上沖霄卵既成形聞雷聲自泉間漸起而上其地之色與氣亦漸顯而明未起三月前遠聞似秋蟬鳴闕在手中或如

醉人聲此時蛟能動不能飛可以掘得及漸上距地面三尺許聲響漸大不過數日候雷雨即出出多在夏末秋初善識者先於冬雪時視其地圍圓不存雪又素無草木復於未起二三月春夏之交觀地之色與氣掘至三五尺其卵即得大如二斛甕頸以不潔之物或鐵與犬血鎮之多備利刃剖之其害遂絕又蛟畏金鼓及火山中久雨夜立高竿掛一燈可以辟蛟夏月田間作金鼓聲以督農則蛟不起即起而作波但疊鼓鳴鉦多發火光以拒之水勢必退皆得之經歷之故老鑿鑿有據者也公乃爲之印證其說曰月令季夏夏正之六月也今言蛟之出在夏末秋初

其可信一也志稱宏治十七年廬山鳴經三日雷電大雨
蛟四出今言蛟漸起地聲響漸大候雷雨即出知向所謂
山鳴乃蛟鳴也其可信二也許旌陽鎮蛟以鐵柱今言蛟
畏鐵其可信三也兵法潛師曰侵聲罪曰伐今震之以金
鼓燭之以火光如雷如霆儼若六師之致討與伐之義相
合其可信四也夫以蛟之不難制若此而數千百年以來
罕有言者蓋田夫野老知而不能言文人學士鄙其事而
以爲不足言司牧之官又執掌於簿書而不暇致詳也一
旦橫流猝發載胥及溺然後開倉廩以賑恤之則已晚矣
天下狃於故常而忽於遠慮貽害可勝道哉余故亟錄其
說廣爲刊布且懸示賞格有掘得者官給銀十兩使僻遠
鄉村之地轉相傳說人人屬耳目注精神先時而偵候臨
事而周防庶幾大害可除此邦永業其福而他省之有蛟
患者皆可踵而行之幸毋以爲不急之迂談也